



PRIJEDLOG REZOLUCIJE

**O HISTORIJSKOJ VRIJEDNOSTI I VAŽNOSTI PRVOG
ZASJEDANJA ZAVNOBIH-A (25. NOVEMBAR 1943.) ZA
DRŽAVNOST BOSNE I HERCEGOVINE**

Predstavnički dom Parlamentarne skupštine Bosne i Hercegovine, na osnovu člana IV.4.(e) Ustava Bosne i Hercegovine, na sjednici Predstavničkog doma, održanoj _____ 2009. godine, usvojio je

REZOLUCIJA

O HISTORIJSKOJ VRIJEDNOSTI I VAŽNOSTI PRVOG ZASJEDANJA ZAVNOBIH-A (25. NOVEMBAR 1943.) ZA DRŽAVNOST BOSNE I HERCEGOVINE

1. Predstavnički dom Parlamentarne skupštine Bosne i Hercegovine potvrđuje važnost i vrijednost Prvog zasjedanja Zemaljskog antifašističkog vijeća narodnog oslobođenja Bosne i Hercegovine (dalje: ZAVNOBIH), koji je, na jednoj strani, ukazao na kontinuitet državno-pravne bosanskohercegovačke tradicije, obnovio državnost i što je, na drugoj strani, bio legalističko-pravni i legitimacijsko-politički osnov za kasniji državno-pravni razvoj Bosne i Hercegovine sve do njene, međunarodno-pravno priznate, nezavisne državne egzistencije.
2. Predstavnički dom Parlamentarne skupštine Bosne i Hercegovine ocjenjuje da je Prvo zasjedanje ZAVNOBIH-a predstavljalo prvo istinsko narodno predstavništvo, sastavljeno iz sve tri etno-kulturne zajednice koje je u posljednjih 480 godina moglo suvereno odlučivati o političkoj budućnosti Bosne i Hercegovine.
3. Predstavnički dom Parlamentarne skupštine Bosne i Hercegovine iskazuje zahvalnost antifašističkim borcima i građanskim političarima iz svih bosanskohercegovačkih naroda koji su stali na stranu oslobodilačke borbe, protiv okupatora i domaćih kvislinga. ZAVNOBIH je predstavljao pobjedu političke volje svih bosanskohercegovačkih naroda i građana, kao i presudan momenat u njihovom svrstavanju u veliku koaliciju savezničkih zemalja protiv trojnog fašističkog saveza Njemačke, Italije i Japana.
4. Predstavnički dom Parlamentarne skupštine Bosne i Hercegovine je jednoglasan u ocjeni da je veliki historijski smisao Prvog zasjedanja ZAVNOBIH-a u tome što je predstavljao koncentraciju i trijumf tradicionalnog bosanskohercegovačkog ethosa i politike konvergencije. Na ovom zasjedanju potvrđeno je da socijalna, nacionalna i vjerska polifonija bosanske zbilje može naći tačku sinteze i dosegnuti izvorišta svebosanskohercegovačkog sabiranja.
5. Predstavnički dom Parlamentarne skupštine Bosne i Hercegovine još jednom podsjeća da je proglašenje nevažećim odluka ZAVNOBIH-a na nelegalnom i nelegitimnom zasjedanju tzv. Narodne skupštine tzv. Republike Srpske (20. jula 1993. godine) uzaludno i ništavno, jer je usvojeno od strane paradržavnog tijela pravno nepostojeće Republike Srpske. To znači da navedeno paradržavno tijelo unutar međunarodno priznate države Republike Bosne i Hercegovine nije ni moglo donijeti Odluku o proglašenju nevažećim odluka donesenih na zasjedanju ZAVNOBIH-a. Potpisivanjem Dejtonskog sporazuma Republika Bosna i Hercegovina nastavlja svoj kontinuitet po međunarodnom pravu pod imenom „Bosna i Hercegovina“, u istim zavnobihovskim granicama.
6. Predstavnički dom Parlamentarne skupštine Bosne i Hercegovine potvrđuje historijsku činjenicu da je 25. novembar dan obnove bosanskohercegovačke državnosti. Taj datum se ne može izbrisati iz historije bosanskohercegovačkih naroda i građana nikakvim odlukama, ma koja stranka bila na vlasti u Bosni i Hercegovini i ma kakve nacionalističke grupe to željele u Bosni i Hercegovini i van nje.

Predsjedavajući Predsjedavajući
Predstavničkog doma Doma naroda
Parlamentarne skupštine BiH Parlamentarne skupštine BiH
Milorad Živković, s.r. Ilija Filipović, s.r.

O B R A Z L O Ž E N J E

I. USTAVNO-PРАВNA OSNOVA

Ustavna osnova za donošenje ove Rezolucije sadržana je u članu IV/4. e) Ustava Bosne i Hercegovine, kojim je regulisana nadležnost Parlamentarne skupštine Bosne i Hercegovine za donošenje ostalih akata potrebnih za izvršavanje njenih dužnosti.

II. RAZLOZI ZA DONOŠENJE REZOLUCIJE

Imajući u vidu historijski značaj 25. novembra 1943. godine za državu Bosnu i Hercegovinu i njene narode i građane neophodno je da najviši zakonodavni organ nedvosmisleno iskaže svoje stavove u vezi s ovim datumom. Ovo je, posebno, važno zbog dosadašnjeg marginaliziranja značaja Prvog zasjedanja ZAVNOBIH-a. Rezolucija Prvog zasjedanja ZAVNOBIH-a je bila konstitutivni akt Bosne i Hercegovine kao jedne od predviđenih federalnih jedinica odnosno republika u okviru nove zajedničke državne zajednice. Zbog toga se 25. novembar i proslavlja kao dan obnove bosanskohercegovačke državnosti.

ZAVNOBIH je više od jedne konferencije, više od jednog politički značajnog događaja. On je historijski datum i događaj najvišeg ranga za sve bosanskohercegovačke narode i građane, događaj koji je promijenio smjer historije i na historijsku scenu izveo nove društvene snage i nove političke ideje.

Zato je važno da Predstavnički dom Parlamentarne skupštine Bosne i Hercegovine, kao najviši organ zakonodavne vlasti u državi, usvajanjem ove Rezolucije pokaže da je opredjeljen da gradi Bosnu i Hercegovinu jednakopravnih naroda i građana, na tragu zavnbihovskih načela i principa. Upravo zbog toga ova Rezolucija ima za cilj da istakne značaj Prvog zasjedanja ZAVNOBIH-a, ali i pokaže opredijeljenost države da poštuje antifašističke vrijednosti na kojima počiva moderna Evropa.

Poslanik SDP BiH
Mr.sc. Denis Bećirović